

Bevor isch mich uffreesch ...

Isch wollt joo eischendlich iwver die derzeitische Flerscherer politische Verhältnisse schreiwe, trink awwer lieber e Tass Kaffee aus moiner Sachsehäuser Kaffeetass, wo druffstiegt: „Bevor isch misch uffreesch isses mir lieber egal.“

No ja, su egal iss mir dess mett de Flerscherer Politik eischendlich nitt, awwer isch will mich halt nimmi uffreesche. Doo driwwer habb isch aach mett moim ahle Kummbeer Schorsch geschwätzt unn der hotts uff e onner Art ausgedriggd: Honnes, iwver die Flerscherer Politik due isch schunn e gons Jahr nix mieh lese, isch wills nitt, unn wenn ebbes im Fernseh kimmt iwver de Trump, iwver de Kriesch in Syrien odder de Hass in dene asoziale Netze, waaßde, was isch doo mache due? Nooch emm ersde Wort iwver su ebbes mach isch oofach de Ton ewegg, doo kennese grad babbele wasse wolle. Unn wenn donn de Sport odder dess Wedder kimmt, mach isch de Ton widder oo. Unn moi Kättche hott nix degeesche, naa, die will vunn dem gonse Dreck aach nix heern.

Schorsch, saach isch, isch machs joo aach su. Awwer wie sollen dess donn wern? Wenn uns alles egal iss, wie solle merr donn bei de nächsde Wahl entscheide ferr die oo odder onner Partei, ferr den oone odder onnere Kandidat?

Dess siehdsde doch heit schunn, gibt de Schorsch ze Antwort, gugg derr doch emol die Wahlbeteilichunge oo. Immer mieh Leit denke, die doo owwe mache suwiesu wasse wolle, warum soll isch donn noch wähle gieh?

Ach, saach isch, wens nor mir Alde wärn, die su denke, donn gings joo noch. Awwer aach vill junge Leit gieh nimmi wähle unn die missde doch intressierd soi wies ferr se weitergeht, odder?

De Schorsch hott gegrinst. Die Junge missde intressierd soi wies weidergeht? Honnes, die denke doch nor noch onn sich unn onn den Abberat, den se allsfort in de Hond odder omm Ohr hawwe, aach im Audo. Was dusde donn mett dene. Isch habb jetz dem Opel geschriwwe, mir frieher hädde noch den Winker im Opelaudo oigebaud unn donn iss de Blinker kumme, unn jetz, su habb isch dene geschriwwe, kennde se Geld sparn unn uff die Blinker verzichte, ess dudenn vunn dene junge Leit suwiesu kooner mieh brauche.

Doo hosde recht, Schorsch, saach isch. Weil wenn isch innen Kreisverkehr fahrn will unn nitt enoi kann, weil grad e Audo vunn links dorsch de Kreisel kimmt, donn due isch wadde weil isch moon, der bleibt im Kreisel, awwer naa, der fährt außem Kreisel enaus unn hott nor nitt geblinkt. Odder unne in de Hauptstrooß, omm Audo-Schmitt, wennde dorsch die Unnerföhrung gefahrn bist, doo wadddsde omm Vorfahrtschild weilde moonst, der vunn de Stadt her kumme dut deet weider in die Liebigstrooß fahrn, awwer Peifedeckel, der biescht zur Unnerföhrung ab, ohne soin Blinker gesetzt ze hawwe.

De Schorsch hott iwverleeschd unn donn gesaad: Honnes, mir sinn widder mol vumm Hinkelsche uffs Giggelsche kumme, wieso eischendlich?

Ei, gebb isch ze Antwort, weil merr uns nimmi uffreesche wolle, nitt iwver die Politik unn nitt iwver dene junge Leit ihrn Blinker. Unn doch isses uns nitt egal.

Ja, seet de Schorsch, dess alles iss uns nitt egal, awwer uffreesche dun mir zwaa uns nimmi.

Eiern Honnes

